

VONDE STRUMENTALIZAZIONS. INCUINTRI PAR DIFINDI LA LEÇ SU LA MARILENGHE. A PRO ANCIJE IL RETÔR HONSÈLL: «IL PLURILINGUISIM AL È UN VALÔR COGNITÎF»



«Il furlan al è ricjece»

Fuart apel ae Regjon e ai parlamentârs furlans par clarî il spirt e i contignûts de leç regionâl pe tutele de lenghe furlane denant dal Guvier talian, cuintri cui che al vûl impugnâle

UN FUART APEL AE REGJON e ai parlamentârs furlans par clarî il spirt e i contignûts de leç pe tutele de lenghe furlane, la 29, chê fate buine dal Consei regionâl ai 23 di Novembar dal 2007, denant dal Guvier talian, di mût di sconzurâ la impugnazion de norme denant ae Cort Costituzionâl. Tes ultimis setemanis a son, di fat, lâts indenant i atacs cuintri de leç sul furlan par cont di cualchi rapresentant sindacâl e politic de

regjon, che al à domandât di impugnâ cierts articui de leç, leâts in particular ae scuele, par un ecès di competencis de Regjon a chest rivuart.

Denant di chescj atacs, martars ai 29 di Zenâr te sede de Vite Catoliche a Udin (*te foto*), si son dàts dongje la Università dal Friûl, il Comitât pe autonomie e il rilanc dal Friûl, il Comitât 482, la Vite Catoliche, Radio Spazio 103 e Radio Onde Furlane: i stes sogjets che a vevin promovût la Assise

des rapresentancis furlanis dai 11 di Setembar e altris iniziativis a pro di une gnove leç sul furlan.

Pûr stimant «strumentâls e cence fonde» lis criticjis fatis ae leç e «ideologjichis» lis posizions di contrast, i promotôrs de conference stampe a àn batût su la necessitât che i parlamentârs le sostignedin denant dal Guvier (no cate la crisi in at, la leç e podarès jessi impugnade dentri di 60 dîs de só publicazion), ricuardant l'articul 6 de Costituzion («La Republiche e tutele cun normis di pueste lis minorancis linguistichis») e che la leç regionâl e da atuazion a chê statâl, la 482/99.